

大清會典  
禮部



大清會典卷之

禮部

儀制清吏司

經筵

凡

經筵講書之禮。以大學士尚書都御史侍郎學士詹事充。

經筵講官。滿漢各八人。歲春秋仲月。由部疏請。得旨。翰林院列講官名具奏。以滿漢各二人。分講經書。掌院學士暨直講官。擬篇目。撰講章。奏請。



欽定。至日黎明。遣大學士一人。祇告。

皇師。

帝師。

王師。

聖師。於

傳心殿。

親詣。行禮。則於前一。日均詳見吉禮。

鴻臚官設

御案於

文華殿

御座前。南嚮。設講案於

御案之南。北嚮。翰林院官奉講章。及進講副本。左書

右經各陳於案。退。記注官四人。立西階下。東面。

滿講官暨侍班之大學士。吏部。戶部。禮部。尚書

侍郎。通政使。副使。詹事。少詹事。立丹墀左。西面。

漢講官暨侍班之兵部。刑部。工部。尚書。侍郎。左

都御史。左副都御史。大理卿。少卿。立丹墀右。東

面。糾儀給事中。御史各二人。鴻臚寺。鳴贊二人。

立侍班官稍後。東西面。均南上。如行聖公入

覲恭遇

經筵。立於東班之首。至時。禮部堂官詣

乾清門。奏請

御經筵

皇帝御常服乘輿出宮。導引扈衛如常儀。由後左門出左翼門至

文華殿丹陛上降輿入

陛座。記注官升西階入立

殿內右楹之西。鳴贊升立東西檐下。贊排班。講官暨侍班官咸就拜位。北面立。贊跪叩。興行二跪六叩禮畢。鴻臚卿東西各一人引講官暨侍班官分行。升自東西階。滿講官由

殿左門之右。漢講官由右門之左。入立於東西楹

之南。東侍班官由左門之左。西侍班官由右門之右。入立於講官後。糾儀官隨入。立東西隅。均東西面。北上。鴻臚卿退立於

殿檐下。鳴贊贊進講。滿漢直講官四人出至講案前。東班西上。西班東上。行一跪三叩禮。復位立。滿講官一人出東班折旋就案左。北面展講章。進講。四子書畢。退數武。復位。漢講官一人出西班趨過案左。進講如之。

皇帝闡發書義精蘊。宣示臣工。講官暨侍班官跪聆。畢。興。又滿講官一人趨過案右。漢講官一人出

就案右先後進講經義畢

皇帝闡發經義精蘊各官跪聆亦如之

御論畢鴻臚卿引出

殿至丹墀各就拜位立鳴贊贊如初行二跪六叩

禮畢內監設坐氈於

殿內東西各二行鴻臚卿引講官侍班官按品臚

序仍升東西階入

殿內

賜坐

賜茶儀與常朝同禮部尚書奏禮成

駕興至丹陛陛輿還宮是日

賜宴於

太和門東廊講官暨侍班記注糾儀各官咸與宴

畢詣內金水橋南丹墀東行一跪三叩禮各退



--	--	--	--	--	--	--	--	--	--	--	--	--	--	--	--



